

萬有文庫

第二集七百七種

王雲五主編

萬曆重修二百二十八卷本

明會典

(三十二)

申時行等重修

商務印書館發行

萬曆重修二百二十八卷本

明會典

(三十二)

申時行等重修

國學基本叢書

萬有文庫

第 二 集 七 百 種

總 編 纂 者

王 雲 五

商 務 印 書 館 發 行

明會典卷之一百二十

兵部三

【銓選三】

【武職襲替】

武官世職。歿者承襲。老疾者替。載在職掌。累朝以來。事例益繁。武官多故絕。以旁枝繼。其族屬踈遠者。名曰犯堂。例不得襲。洪武中。五十以上者。許子替職。後皆以六十爲限。未及者。名曰未六。例不得替。他如犯罪冒功之類。皆有減革。今備列焉。

凡襲職替職。洪武二十六年定。凡軍官亡故。年老征傷。須以嫡長兒男承襲替職。或嫡長男早喪。及篤疾殘疾。則嫡孫襲替。如無嫡子嫡孫。則庶長子襲替。若嫡庶子孫俱無。方許弟姪襲替。其應合承繼弟男子姪。務要曾經操練。弓馬熟閒。并當該衛所正官保結呈送。其審供查黃引選等項緣由。並與除授官員相同。○永樂元年。令官舍旗軍餘丁。曾歷戰功。陞授職役。其子准承襲。無子。其父兄弟姪。見授職役小者。俱准襲職。事相等。無應襲者。義子女壻。不准襲。若先不曾立功。就與職役。後亦無戰功者。不准襲。指揮千百戶子弟。隨征有功。陞指揮千百戶。後征進有功。陞職者。准承襲。不曾征進者。不准。若已致仕。後有功。陞職。亡故并告代者。原替職。或見支優。給子孫職任小者。就與父兄所陞職事。若職事相等。不許以次子孫別

襲○二年題准軍職正妻無子其妾婢所生子均爲庶子不論母之次序止以年長者承襲○成化八年令武職原係帶俸者子孫襲替仍帶俸係管事者仍管事○十七年奏准武職絕嗣旁枝不許襲如已襲者不許再襲義男女壻詐冒承襲不改正者照例治罪○二十二年題准降級官見在伊子暫替見降職事父故之日仍襲祖職若子替職後病故孫該承襲降級之祖見在亦准襲復祖職若子替降職後獲功陣亡孫又承襲雖降級祖見在亦准襲原祖職仍加伊父陣亡一級若子未替故孫承祖仍暫替所降職事○弘治三年奏准旁枝承襲例如高曾祖原係功陞總小旗以後從曾伯叔祖或從伯叔祖堂伯叔又立功陞官者指揮革襲試百戶千戶革襲署百戶子孫准承襲百戶革充冠帶總旗一輩子孫止替旗役其試職署職如無軍功雖遇例不許實授若高曾祖止是軍役不係功陞總小旗旁枝子孫不准承襲○十二年令一祖從軍代役立功之人絕嗣者其親弟姪並許相沿承襲弟姪長房絕嗣次房子孫爲堂兄弟者亦准襲若隔一二輩不曾承襲今來告者其原立功之人係指揮減襲試百戶千戶減襲署百戶百戶替冠帶總旗一輩以後止替總旗若堂伯叔兄弟旁枝子孫不分已未襲替俱不許襲○十三年奏准年未及六十有告殘疾願替職者在內從兵部驗實在外從原衛勘明兵部查照引奏附選○十八年議准立功之人故絕親弟或親姪已經襲職者許相沿承襲或親弟姪原未經襲其姪孫已下及堂兄弟姪等旁枝俱不許襲保勘違例者問罪調衛○正德元年奏准旁枝子孫承襲如高曾以上原無職役親祖

父襲替堂伯叔兄職者後自得功不分署職實授凡一級者併收總旗子孫世與冠帶二級者世襲署百戶其無功旁枝子孫一體准收總旗○嘉靖十年申明弘治十八年例立功人故絕同時親弟親姪應合承繼及曾經襲過者方許遵照律例保送其姪孫以下及堂兄弟姪除親祖例前相沿又立有軍功者一體扣算保送其餘無功姪孫以下至堂兄弟姪等項及各祖沿襲職事之後別無自立軍功不許一槩保送違者軍職問罪調衛文職照例發落遇例不宥其旁枝子孫革去職役者在內從兵部在外從巡撫衙門照總小旗同宗之人皆得替補例俱收充總旗照例併鎗有功一體陞授○十三年題准軍職患病子替職後故絕本官病痊年未及六十戶無應襲之人准復原職○三十年議准新官優養不拘年限生子准襲舊官十年內生子准襲無子爲民○三十一年題准各衛所官員年六十以上自知功次宗枝欠明畏懼減革或例無承襲難以告替俱行該衛所住俸該襲替者保送子孫襲替不該襲替者查革隨住○三十七年題准軍職官年滿六十不行告替減革半俸○又例軍職娶樂人之女爲妾生子雖係長男亦不准襲令無礙庶次男承襲如無庶次男取大次房應襲之人承襲戶無應襲之人卽行停革其故官正妻照例優養家產仍歸所生親男○凡立功未滿患疾殘痼不能應役者許立功衛分驗的保送應繼兒男替職仍隨營殺賊扣算限滿方回原衛支俸其限未滿而逃者不許替

凡襲替借職正統七年令武職故而嫡長子孫年十歲以下者許庶男弟姪借職候嫡長出幼還職違者

充軍十歲以上不許。○續定。惟老疾無子。方許弟姪借職。如後疾愈生子。借職之人不行退還者。問發邊衛充軍。其有子年幼。照例優給。雖稱有疾。亦不准借。○嘉靖十一年議准。應襲舍人果患殘疾。原無優給兒男者。許令相應之人借職。生子退還。○又例。借職後自立軍功陞級。後續生有子。將原借祖職退還。其自立之功。令本身子孫。扣算級數襲替。

凡推用武官襲替。成化十三年。令在京帶俸選出兩廣等處衛所管事亡故。而所遺幼子單丁。不願復任者。許留原處帶俸差操。○弘治十六年議准。京衛推選各都司都指揮官。遇有事故。子孫襲替。回原衛願留在彼者。聽錦衣衛仍照例改註京衛。其因事降調。不在此例。○嘉靖三十三年題准。在京各衛所調任官。管事年久。子孫襲替。該衛將調任生子來歷。移關原衛保送。如有不肯回衛。巧爲影射。及扶同冒保者。照妄保例。一槩罷職。揭黃。永不許襲。

凡陞職官舍襲替。景泰元年。令軍職獲功陞級。未任先故者。伊男准襲陞。若指揮使陞都指揮。故者。雖未任。不准襲陞。○弘治十三年。令官舍人有功陞職。過於父祖者。子孫襲所陞職。開原職如不及父祖者。襲原職。開所陞職。嫡長男已襲職。嫡次男有功陞職。而絕嗣者。別枝不許襲。襲職官爲事革罷者。子孫襲祖職。○正德二年。令武舉中式。應襲舍人襲替。准加陞武舉署職。後子孫仍襲祖職。○嘉靖五年議准。凡父祖降級。後再立軍功。與祖職相等。或不及祖職者。止許襲祖職。若過於祖職者。方准襲陞。○十年。令凡軍

職高曾祖原有官職其伯祖并堂伯堂兄襲授之後再立軍功陞職子孫襲故絕以後堂兄弟姪并姪孫等項襲替者止該襲替祖職其伯祖堂伯堂兄自立軍功陞職不准襲○三十一年題准領軍官部下獲功陞級子孫襲替止襲祖職若有擬陞未任先故者許其襲陞一輩以後查革○萬曆十二年題准軍民本身立功陞職故絕如有的親弟姪保送赴部查其功陞止一二級照例准襲三級以上量減一級七級以上減二級如無親弟姪其伯叔弟姪俱不准襲

凡陣亡武官承襲正德十四年奏准爲事降級陣亡者許襲陞陣亡一級○嘉靖七年奏准陣亡絕嗣弟姪承襲祖職或伯叔兄弟自立軍功累至指揮使以上陣亡者應襲之人止許襲指揮使本身加贈一級係都指揮陣亡者贈級仍加祭一壇○凡都督陣亡子孫襲陞祖職加一級○三十五年題准都指揮及指揮使陣亡者承襲之人不拘子孫弟姪只襲祖職止於指揮使若原襲指揮使以下軍功有應減革者准扣算累陞亦至指揮使而止○又例陣亡奉有欽依保送襲職者襲流官一輩以後襲替仍至指揮使而止○二十七年題准舍人奮勇遇敵陣亡無子承廕者准令兄弟姪承襲應陞職事○二十九年題准軍職獲功累陞至都指揮以上對敵陣亡者除本身卹典長男承襲祖職外仍廕一子指揮僉事世襲年幼者全俸優給如無次子卽於長子承襲祖職上加陞三級至流官不世襲

凡爲事官含承襲洪武二十九年令祖從軍父爲事典刑襲祖職父從軍兄爲事典刑襲父職父從軍就

爲事典刑者發充軍。○景泰五年令犯竊盜掏摸搶奪盜官畜產者問罪如律仍革職發原籍爲民聽應襲者襲。○成化十四年令降調充軍者本身在不准襲。○二十二年令逃官不知去向三年准襲無子准借被告脫逃該徒以上問革爲民者至六十乃許襲。○弘治七年令強盜自首免死及犯充軍遇蒙恩宥者各革職發原籍爲民仍候身終許令次房無礙子孫保送襲職。○嘉靖十年令凡充終身軍及爲民後不分新舊官十年以內生子者准優級襲職十年以外生子者革發爲民另取次房襲職。○十三年題准舍人充終身軍及爲民者不待身終年老其子孫准襲祖職。○又題准凡自己獲功自己犯罪除充軍降級革職爲民不襲外若犯該立功徒杖以下曾經復職者候子孫襲替之日查照功次應該世襲者准世襲如陣亡一體襲陞其自己獲功又犯降級者除該降級數不襲仍有未降職級查係軍功照例承襲。○三十四年令犯罪典刑次房承襲後自立軍功陞職者革祖職扣襲軍功職。

凡調衛武官襲替弘治十三年題准軍官調衛者子孫襲替不得還原衛。○正德十一年奏准軍職犯該人命失機典刑宿娼等罪或人命軍機律應至死欽減充軍者子孫襲替照例調衛其餘徒杖等罪并雜犯律不應死及勘問未結病故者襲替免調。○嘉靖三年奏准逃操降級調衛事故子孫俱許告替祖職聽回原衛。○五年奏准王府護衛并儀衛司軍職止犯徒杖等罪或因有過奏調遇詔應回原衛者子孫襲替俱改註附近衛所帶俸差操。○萬曆十二年議准軍職宿娼調衛犯姦爲民者子孫襲替免調衛。錦

衣衛及王府護衛官仍照舊例改調

凡犯罪降襲弘治四年令軍官犯強盜窩主不分賊及不行者襲職降一等○九年令應襲舍人犯劫盜者弟姪照祖職降一級承襲該優給者依此例○正德十年令調衛不赴任十年之上病故者子孫襲職降二級萬曆十一年題改降一級○嘉靖十年題准軍職犯該強盜問招未明身故者應襲之人查照祖職上減襲一級○十一年議准軍職犯侵盜邊方錢糧永遠充軍者但係洪熙元年以後陞職子孫不准襲若係洪武永樂年間有功人子孫不分監故發遣遇革免賊除本犯子孫不准襲許各衛所將有功人大次房無礙子孫及備抄原犯招由連人保送赴部查議於祖職上量降一級不待本犯身終承襲如無次房卽行停革○十五年題准武職有犯知強盜後分賊未擬充軍者子孫襲職或優級俱於應襲職事查降三級○又例軍職失機誤事罷職發邊遠充軍遇宥蒙特恩降級者身終年老之日止許襲替所降職事帶俸差操不得復還祖職○凡舍人犯宿娼及和娶樂人爲妻妾者問罪附過候承襲之日降一級調邊衛○凡軍職已經替職閒住犯該杖罪降級本身例不降級仍將替職弟男人等各依父兄該降品級授職待本官身終仍復祖職○萬曆十二年題准洪永年間軍職絕嗣保送旁枝子孫襲替照例駁查無礙查係父祖四輩以下姑准承襲五輩以上量革一級若係永遠充軍大次房子孫襲替如係四輩以下仍降一級五輩以上遞降二級例前襲過者候子孫襲替日減革如大次房子孫降襲後又犯永軍者係再犯重罪

之家。卽行革襲揭黃。

凡犯罪革襲。宣德四年令。武職及子弟有犯不孝。并敗倫傷化者。不許復職承襲。○五年令。守城失機。貽患邊方者。不准襲。○正統十四年令。臨陣退怯。致所部失陷二十人者。不准襲。○成化十五年令。納粟招軍。陞職者。自己立功陞官後。爲事罷職。及充軍者革。○弘治七年令。犯刼盜。問擬明白。不分典刑。監故。子孫永不許襲。○十八年令。犯失機死罪。欽斷永遠充軍。雖遇恩宥。仍留殺賊。未經獲功贖罪復職。子孫不許承襲。○正德四年奏准。軍職輕信婢妾。謀殺正妻。除本犯依律問罪外。子孫不許承襲。○嘉靖十年奏准。軍職犯永遠充軍者。不分監故發遣。雖遇赦宥。子孫照舊不許承襲。數內追贓不完。未經發遣。或在途病故。未到配所。及遇恩例放回寧家者。官職雖不許襲。其軍役亦免解補。其犯侵欺邊海錢糧者。不在此例。○十八年令。爭襲官爵。謀殺親枝者。問罪揭黃。雖有族屬。永不許襲。○二十一年題准。武職有犯盜用印信。假與人官者。不問典刑。監故。俱揭黃。發本衛隨住。子孫永不許襲。○又題准。犯該謀叛者。不問典刑。監故。俱揭黃。子孫永不許襲。○三十三年題准。武職與土官夷人交結往來者。審有實迹。照交結夷人引惹邊釁例。問發邊衛永遠充軍。子孫不許承襲。○又題准。軍職犯該人命失機強姦真犯死罪。及饒死充軍。問擬明白。不分典刑。監故。子孫俱不許承襲。其有例前襲過者。若係洪武永樂年間犯事。就在洪武永樂年間承襲過者。子孫照舊承襲。若係洪熙以後犯事。子孫雖經襲過。不拘三輩五輩。待後襲替之日。一

體查革。○又題准。軍職有犯不孝除極惡大逆坐以本罪及違犯教令別籍異財等杖罪以下。應該還職。差操者。俱不議外。如有犯毆罵祖父母父母。并繼祖母。繼母。牛母。但係問擬死罪。或典刑監故。或蒙恩饒死。或遇例革職充軍爲民。雖經宥免。均屬不孝。不拘襲過輩數。無論本房次房。俱不許襲替優給。發回各衛所隨住。其舍人有犯與職官同。○又例。凡舍人因父老疾。以活作死。襲職。照文職詐稱父母死亡。發口外獨石等處充軍例。其襲後盜支倉糧。監追完日發配。本犯子孫。不許承襲。○萬曆十二年題准。軍職犯強盜情真者。不拘典刑監故。脫逃自縊。俱照例揭黃子孫及次房。槩不准襲。

凡功次減革。天順三年令。擒獲強盜陞職者。不准襲。○成化元年令。正統十四年。守城有功陞職者。被虜走回。遇駕拏馬。及出使瓦剌乞陞者。天順初迎駕陞者。擒獲妖言陞者。俱不准襲。○正德十三年奏准。成化四年建州。并弘治四年。白嶺灘等處功次。內奮勇當先議賞。特恩准陞者。不准襲。其餘各年。當先被傷。驗實擬陞者。准襲。○十六年詔。正德十二年。大同應州功次。除本邊官軍。自斬首級應陞外。其餘不分已未陞級。盡行查革。○嘉靖元年奏准。正統十四年。景泰元二三年。當先招募。及越陞官職者。查對欽陞文簿。并內外黃相同。照舊不革。或例前曾經減革者。候子孫襲替改正。其餘前後各該年分。一體照例查革。○十年題定。歷年應襲應革功次。除永樂年間。瓦剌奴兒干等處地方招諭。及併鎗中箭陞級官旗。仍舊准襲。洪熙元年以後。瓦剌奴兒干等處公幹招諭。併鎗中箭陞級官旗。俱照正德十六年例。減革。宣德十

年四川松潘功次斬首陞級官旗准襲內有越陞者照嘉靖元年例減革正統元年兀魯乃奇功陞二級官旗准襲正統六年雲南麓川征苗賊頭功奇功及斬首陞級官旗准襲內有越陞者照嘉靖元年例減革正統九年迤北克列蘇擒斬賊級陞授官旗准襲內有越陞者照嘉靖元年例減革正統十四年至景泰元二三年大同東嶽廟雷公山黑峪口石佛寺宣府東南二小門洋河橋居庸關山西偏頭關代州北直隸文安霸州紫荆關西直門德勝門彰義門遼東八里莊龜兒山扣河空背陰寨佛僧洞等處當先被傷并殺賊有功越陞職級照嘉靖元年例准襲其召募陞級及當先又越陞者仍不准襲正統十四年至景泰元二三年福建浙江征剿鄧茂七葉宗流等賊獲功六次并十二次陞二級官旗准襲內有當先越陞者照嘉靖元年例減革景泰三年貴州香爐山景泰五年草場等處擒斬賊級三名以上陞級官旗准襲內有越陞者照嘉靖元年例減革景泰四年貴州開通道路陞級官旗照嘉靖元年例減革景泰四年遼東登州營等處功次內該陞一級給賞擒斬賊級官舍准襲內擒斬賊人男婦及被傷當先交鋒并前探賊營官旗俱照嘉靖元年例減革景泰五年雲南飛煉等處功次陞二級陣亡官軍准襲內陞一級總領官攻破賊寨并督運糧餉齎執旗牌紀功督陣官監生俱照嘉靖元年例減革天順元年山西偏頭關斬首陞級官旗准襲其當先被傷爲從陞授官旗俱照嘉靖元年例減革天順元年大同磨兒山黑石崖斬首陞級官旗准襲內有當先被傷及越陞者照嘉靖元年例減革天順元年大同楊家營等處功次奮

勇先入賊陣殺賊首級官旗准襲內有奮殺賊被傷等項陞一級者俱照嘉靖元年例減革天順元年寧夏沙山兒等處功次有擒達賊斬獲首級并陣亡官軍准襲內敵退賊營當先殺賊首級者照嘉靖元年例減革天順四年延綏西黃梁等處功次五次殺賊陣亡官旗准襲天順五年四牌樓殺反賊曹欽有功准襲內有越陞者照嘉靖元年例減革天順六年至成化四年兩廣功次陸續斬蠻賊首八顆陞一級四顆陞署一級俱不准襲天順七年貴州東苗功次擒斬苗賊賊級三名以上陞級官旗准襲內有越陞者照嘉靖元年例減革天順八年兩廣功次擒斬賊級三名以上陞級官旗准襲內有越陞者照嘉靖元年例減革成化元二年廣西荔浦大藤峽擒斬賊級三顆以上陞級官旗准襲內有越陞者照嘉靖元年例減革成化三年湖廣荆襄斬首三顆以上陞實授一級官旗准襲內有越陞及斬首二顆陞署一級者減革六年荆襄斬首四顆陞實授一級三顆陞署一級者不革成化四年貴州山都掌斬苗賊首三顆以上陞級官旗准襲內有越陞者照嘉靖元年例減革成化四年遼東建州擒斬虜賊首級陞實授官旗准襲其斬首爲從奮勇當先被傷俘獲賊屬所陞署級俱照嘉靖元年例減革成化五年固原石城兒等處征剿土達滿四等斬首陞級官旗准襲其當先又被傷并先被傷後擒斬一二名顆爲從陞署級者俱照嘉靖元年例減革成化六年榆林開荒川斬首陞級官旗准襲其斬首爲從又陣傷并當先又陣傷與管領旗牌催戰及把總官殺賊一次無部下首級數目陞級及斬首一顆爲從等項陞署一級官旗俱照嘉

靖元年例減革。成化九年榆林征達賊斬首陞級准襲。其當先被傷并斬首爲從。又陣傷及分投督陣。齋執旗牌陞署級者俱照嘉靖元年例減革。成化年間陝西魚兒河紅鹽池斬首陞級官旗准襲。其當先所陞署級并越陞職役照嘉靖元年例減革。成化十二年湖廣荊襄征進流賊斬首三顆以上陞實授一級准襲。其斬首不及數當先陞署級及越陞職役俱照嘉靖元年例減革。成化十二年兩廣征蠻賊斬首三顆以上陞級官旗准襲。內有越陞者照嘉靖元年例減革。成化十五年貴州西堡斬首三顆以上陞級官旗准襲。內有越陞者照嘉靖元年例減革。成化十五年遼東建州斬首陞級官旗准襲。內有三次當先所陞署級并越陞職役俱照嘉靖元年例減革。成化十六年大同威寧海子斬首陞級官旗准襲。內有當先被傷及斬首爲從被傷執旗督陣所陞實授一級并署級及越陞職役俱照嘉靖元年例減革。成化十七年白狐莊功次一人自擒斬達賊一名顆二人共擒斬賊級一名顆俱准襲。內有當先衝鋒被傷督陣三次當先及哨探賊情等項俱照嘉靖元年例減革。成化十九年朔州駝梁等處斬首爲首部下斬首五顆以上并陣亡陞一級回營身故陞署一級官旗俱准襲。成化十九年宣府韓家莊斬首爲首官旗准襲。內有奮勇當先督陣旗牌陞署級者俱照嘉靖元年例減革。成化二十年大同紅牆兒功次陞二級一人自斬首二顆者准襲。內有當先被傷陞級照嘉靖元年例減革。弘治八年甘肅涼州紅山兒功次斬首爲首陞實授一級擒斬賊子一名陞署一級內斬首爲首准襲。其擒斬賊子陞署級係幼小達賊已行給賞例

該減革。弘治九年，哈密蕃國二人共斬賊級二顆，爲首陞實授，并署職二級者，除實授一級，准襲。內署二級，准襲。署一級，其幼小首級，并奪回婦女署級，不准襲。弘治十年，甘肅涼州斬首爲首，陞級實授，并戰傷回營身故，陞署級，俱准襲。弘治十一年，寧夏賀蘭柳溝一人自斬賊級二顆，并斬首一顆，及二人共斬首爲首，俱准襲。內有斬獲幼小達賊，并親執旗牌，督陣殺賊，及三次當先被傷，陞署一級者，俱不准襲。弘治十二年，肅州鎮南卜一人自斬首級一顆，又二人共擒賊級一顆，爲首陞二級者，俱准襲。弘治十六年，陝西鞏蘭領軍官自殺首級一顆，陞一級者，照成化十九年例，減革。弘治十七年，遼東錦州沙河一人自斬首級一顆，二人共斬賊級一顆，爲首准襲。內二人共斬賊級一顆，爲從，陞署一級者，不准襲。弘治十八年，大同焦山兒斬首爲首，陞實授陣傷回營身故，陞署一級者，俱准襲。正德元年，大同一人自斬首一顆，爲首，并部下領軍斬首及數陣亡，及二人共斬賊級一顆，爲首各陞署一級，俱准襲。內先擬給賞，後陞授一級。同二人斬幼小達賊，爲首陞署一級者，俱不准襲。正德三年，大同寧陽鋪二人共斬首一顆，爲首，領軍部下斬首及數，俱准襲。內衝鋒破敵，又被傷陞署一級者，照嘉靖元年例，減革。正德三年，密雲黃崖二人共斬賊級一顆，爲首，陞實授一級，准襲。內二人共斬賊級一顆，爲從，陞署一級者，俱不准襲。正德三年，宣府獨石二人共斬賊級一顆，爲首，陞實授一級者，准襲。內有二人共斬賊級一顆，爲從，又被傷陞署一級者，俱不准襲。

凡冗濫減革。景泰四年令納粟軍職不准襲。○天順元年奏准。武職自永樂後。陞官不以軍功者。總小旗比試中箭陞職者。總小甲冒補總小旗。後有功陞職者。永樂年間。王府保陞官無世襲者。皇親及內官家人。傳奉陞職及保陞者。襲替俱革減。○成化十三年令試職署職。遇天順元年及八年例。實授者。襲替俱減革。○弘治十三年奏准。乞恩陞者。報捷陞者。缺唇跛足矮短殘疾者。俱不准襲。○正德十六年詔。自正德元年以來。武職傳陞乞陞者。俱裁革。其皇親及公主所生子孫。推恩陞授者。不在此限。○又奏准。自正德十四年後。姪孫以下旁枝。違例冒襲者。待子孫襲替一體減革。○嘉靖九年奏准。宣德年後武職。逐一查驗功冊。有總數混開斬首當先而各人名下無斬首字者。凡巧立名色。以軍功爲名。而實無軍功者。及領兵人部下斬首不及數。而得陞署級者。文武內臣子弟人等。非征進軍功。以技藝勤勞傳乞陞職世襲者。俱查革。若皇親駙馬一應戚畹子孫。以恩澤陞許世襲者。候子孫襲替。仍開具襲過輩數。與親誼來歷奏請定奪。○十二年題准。皇親官員子孫襲替。備查黃選明白。若原奉欽依有世襲字樣者。許襲一輩。查無世襲字樣者。止榮本身。不准襲。其例前襲過者。候子孫襲替。照例查革。○三十一年奏准。各衛所官。有陞至都督指揮以上。後坐事革任者。但許食祖職俸。流職俸盡革。其起廢官。亦如今職支俸。冒前俸者。革內外衛所試職署職官。惟遇例實授者如故。有署職獲功止宜實授。而冒陞者。有傳乞越陞者。皆減革。武舉署職。遇例實授加俸。後來所陞職級過於所加及折色改支本色者。皆改正。內外衛所官。有年六十以